

INUIT ATAQATIGIIT INATSIARTUNI



UPA2023/imm 117

16. maj 2023

Asii Chemnitz Narup

Soraarnerussutisiaqarnissamut aaqqissuussinermut pinngitsoorani ilaanissap sunniutaasa aaqqissuussinerullu naapertuunnerata nalilersuiffigineqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nalilersuineq UKA2023 nallertinnagu tamanut saqqummiunneqarlunilu Inatsisartunut agguanneqassaaq.

(Inatsisartunut ilaasortaq Doris Jakobsen Jensen, Siumut)

Oqaaseqaat.

Soraarnerussutisiaqarnissamut aaqqissuussinermut pinngitsoorani ilaanissap sunniutaasa aaqqissuussinerullu naapertuunnerata nalilersuiffigineqarnissaannik siunnersuummut siunnersuuteqartoq Inuit Ataqatigiit qutsaviginiarpaat.

Ukiuni arfinilinggortuni inatsit pineqartoq atuutereersimavoq, pingasoriarlunilu allangortinneqareersimalluni. Tassalu akuersissutigineqareernerani aamma atuuttussangortinneqareernerani nalilersorneqaqqittarnissaa aamma aalajangersakkat ilaasa allangortinnissaannik politikikkut pisariaqartitsisoqarlunilu kissaateqartoqartarsimavoq.

Aningaasanut inatsissip 2022-mut isumaqatigiissutigineqarneranut atatillugu partiit akornanni kingullermik atituumik isumaqatigiittoqarsimavoq inatsisip misissorneqaqqissaarnissaannik, qulakkeerniarlugu innuttaasunut

INUIT ATAQATIGIIT INATSISARTUNI



isertitakinnerusunut pinngitsoorani soraarnerussutisiassanik
katersisussanngortitaanerup pisariaqanngitsumik artukkiisannginnissaa.

Aningaasanut inatsisip isumaqatigiissutigineqarnera tunaartaralugu
aalajangerneqarpoq arlalinnik nalimmassaasoqassasoq, inatsisip
eqquinerlunneri aaqqiiffiginialugit. Innuttaasunut isertitakinnerpaasunut
eqquinerluttarneri aaqqiiffiginialugit.

Innuttaasut isertitakinnerusut allannguutitigut kingullertigut naammattumik
illersorneqarsimangitsut aamma pinngitsoorani utoqqalinersiutissanik
katersisussaataaneq innuttaasunut taakkununnga atorsartitsivallaartumik
allannguutissamik siunnersuuteqartoq isumaqartoq Inuit Ataqatigiit paasivaat.

Naligiinngissutsip akiorneqarnissaa Inuit Ataqatigiit ilisarnaataasa ilagataat –
aamma aningaasarsionnikkut naligiinngissutsip akiorneqarnera. Taamaattumik
aamma pingaaruteqarpoq pinngitsaaliilluni utoqaalinersiutissanik
katersisussaataanerup inatsisiliarineqarnera misissoqqissallugu,
ilangulluguttaaq katersisussaataanermut toqqammaviit.

Piitsuussutsip pisortatigoortumik ammut killilerneqarnissaa
ukiorpassuanngortuni Inuit Ataaqatigiit sorsuutigisimavaat.
Nuannaarutigalutigulu paasisinnaavarput partiit amerlaneruleralluttuinnartut
pisuussutitta naligiinnerusumik agguanneqartalernissaannut aamma
ilungersuuteqalersimasut, taamaasiornitsigut ilaqutariit isertitaqqortuut aamma
ilaqutariit isertitakinnerusut akornanni qunnersuup alliartuinnannginnissaa
anguneqassammat. Naligiinnerulernissamik siunertaqartutut siunnersuut una
paasivarput.

Pinngitsoorani utoqqalinersiutissanik katersisussaataaneq pillugu arlalinnik
misissuisoqareersimavoq, taakkulu – Aningaasaqarnermut Naligiisitaanermullu

INUIT ATAQATIGIIT INATSIARTUNI



Naalakkersuisoq najoqqutaralugu – nalilersueqqinnissamut atorneqarsinnaalluarput.

Doris Jakobsen Jensenip siunnersuutaanut Inuit Ataqatigiit tunngaviusumik tapersiipput, aamma Naalakkersuisup allannguutissatut siunnersuutaa tapersorsorlugu.

Doris Joakobsen Jensenip siunnersuummini aamma ilannguppa kissaatigisani, tassa pinngitsoorani utoqqalinersiutissanik katersisussaataitanerup siunertaata naliliiffigineqaqqinnissaa.

Tamanna uagut akimmissinniannngilarput.

Inuit Ataqatigiinnilli erseqqissassavarput, inuit inersimasut tamarmik namminneq utoqqalinissaminnut ataavartumik utoqqalinersiutissaminnik akiliisarnissaat uagut isumaqatigingatsigu – katersanulli akiliutaasartussap annertussusissaa pineqartup isertittagaanut soorunami naleqquttuusariaqarpoq. Isertitakinnerpaasartullu pisariaqanngitsumik artukkorsorneqartariaqanngillat.

Taamatut oqaaseqarluta suliaq Aningaasaqarnermut ataatsimiititaliamut ingerlateqqipparput.